

增修
補註
正續歷代通鑑輯覽

增補註歷代通鑑輯覽卷之一百十八

清

世祖章皇帝

〔己丑〕順治六年

明永歷帝三年
魯監國四年

春正月朝鮮來貢

遣大學士剛林傳諭朝

鮮國使臣曰朝鮮一年一朝原定閣臣一員尙書一員書狀官一員共三員代覲今念爾國閣臣尙書垂白衰老者頗多且道路遙遠此後或閣臣尙書一員侍郎一員令其代覲書狀官仍舊

清兵至湘潭明督師大學士定興侯何騰蛟死之

明總制堵胤錫與馬進

忠有隙令李赤心高必正爭進忠所取常德進忠大怒盡驅居民出城焚

廬舍走武岡寶慶守將王進才亦棄城走它守將皆焚營潰湖南州縣爲

一空赤心等所至見皆空城旋棄走東趨長沙騰蛟時駐衡州大駭乃令

胤錫向江西檄進忠由益陽出長沙期諸將畢會而親詣忠貞營邀赤心

入衡部下卒六千人懼忠貞營掩襲不護行止攜吏卒三十人往將至聞

其軍已東卽尾之至湘潭湘潭空城也赤心不守而去騰蛟乃入居之清

兵知騰蛟入空城遣將徐勇引軍入勇騰蛟舊部將也率其卒羅拜勸騰

蛟降騰蛟大叱勇遂擁之去絕食七日乃殺之諸軍遂散赤心等走廣西
明永歷帝罷其大學士朱天麟等官陳邦傳許金堡官臨清嘗降流賊受

其職且請堡爲己監軍朱天麟因擬諭譏堡堡大憤丁時魁乃鼓言官十
六人詣閣詆天麟至登永歷所居殿大譁棄官擲印而出永歷帝方坐與
侍臣論事大驚兩手交戰茶傾于衣急取還天麟所擬而罷天麟遂辭位
永歷挽留再三不可陛辭叩頭泣永歷帝亦泣曰卿去余益孤矣初時魁
等謂所擬出嚴起恆意欲入署毆之是日起恆不入而天麟獨自承遂移
怒天麟逐之去并逐其弟爲行人兩子爲御史中書舍人者天麟移居慶
遠王化澄貪鄙無物望亦爲時魁等所攻碎冠服辭去永歷帝乃召何吾
騶黃士駿入直吾騶尋亦爲堡等排去獨士駿起恆在永歷帝乃復召天麟天麟不至上疏
言今國勢果卵路人皆知而建言者絕不問瑣屑一人一事掉頭以爭曰我
古遺直也今而後請勿以四方無利害者孰爲極
重大事而使主上憂社稷其意亦爲堡等發也

克南昌明金聲桓等死之聲桓部將湯執中守進賢門其偏裨潛約內應

清兵因以厚陳佯攻得勝門礮聲聞三百里聲桓等悉衆赴之十九日午
後蒙古固山兵已從進賢門登雲梯而上城遂破聲桓中二矢赴池水死
清師取屍磔之生擒王得仁及宋奎光劉一鵬郭天才等殺之明大學士

姜曰廣投饒家池死。南昌九江南康瑞州臨江袁州等府具平。

二月清兵至信豐。明李成棟敗死。成棟再度嶺攻贛州。不克。屯兵信豐。清兵既定南昌。汴流援贛。直趨信豐。成棟兵敗。諸將欲拔營歸。成棟不可。天久雨。召諸將議。事去者已大半。成棟命酒痛飲。既大醉。左右挽之上馬。渡水。水漲。人馬俱沈。三日後見成棟植立水中。始知其死。諸營皆潰。清兵追至南雄城下而還。永歷帝以杜永和爲兩廣總督。駐廣州。代成棟。閩可義守南雄。可義尋死。以羅成耀代之。命瞿式耜以留守督師兼江楚各省兵馬。

命攝政王多爾袞統兵征大同。攝政王多爾袞師次古兒班口。有喀爾喀碩雷汗下七人攜妻子來歸。言碩雷汗兵馬距我國有十日程。散處于野。王因止大同之行。議出張家口。趨喀爾喀。遣人調外藩蒙古兵。尋師次察喜兒土察汗腦兒。以軍中馬瘠。且蒙古道路無水。遂罷往喀爾喀。轉趨大同。遣人止外藩蒙古兵。

三月攝政王多爾袞拔渾源州。

今山西渾源縣。

拔渾源州後。吏部以輔政德豫親

王多鐸出痘。往啟攝政王。王卽日旋師。至大同。薄城諭姜瓖迎降。瓖報書

略謂闔城之人誓死王縱開誠肆赦誰敢據信是惟更降一諭明指以全活之方王覽啓怒甚

復玉山等縣 廣信知府楊國楨參將康時昇等練兵措餉復玉山等縣江西巡撫朱延慶據奏下部察敘

輔政德豫親王多鐸薨 年三十六時攝政王師次居庸關計至王去纓易素帶泣是日暮馳入京城臨喪德豫親王二福金請殉攝政王再三慰解請益力遂許之

克衡州 何騰蛟旣死堵胤錫乃入衡州與胡一青固守清兵至戰敗一青走廣西胤錫走桂陽清兵遂入衡州初李赤心之入廣西也緣道淫掠龍虎關守將曹志建惡之并惡胤錫或說志建胤錫將召忠貞營圖志建志建夜發兵圍胤錫殺從卒千餘胤錫及子逃入富川猺峒志建索之急猺潛送胤錫于監軍何圖復間關達梧州會永歷帝遣嚴起恆劉湘客安輯忠貞營至梧而赤心等已走賓橫二州乃載胤錫謁永歷帝于肇慶志建遷怒圖復誘殺之闔門俱盡

克福安明大學士劉中藻死之 中藻爲明監國魯王大學士旣陷福寧旋

移駐福安固守不下。至是城破中藻冠帶坐堂上爲文自祭。吞金屑死。時明監國已盡失閩地。鄭彩見事勢窮蹙。遂棄監國去。張名振阮進奉明監國遁居南田。

克復宜君同官二縣。平西王吳三桂等奏克復宜君同官二縣。擊敗逆賊王永強等。斬首七千餘級。獲駝馬四百五十餘匹。

夏四月。命貝子吳達海鎮國公屯齊喀。輔國公巴布泰等帥師往大同。更代英親王阿濟格等兵馬。

增戶部十四司漢主事各一。

乙巳孝端皇太后崩。

招民勸墾荒田。地方無主荒田。由州縣官招徠逃亡。給以印信執照。開墾耕種。永准爲業。六年之後。察視成熟畝數。方准奏議徵收錢糧。

寇陷汾州。寇陷山西汾州府。命端重親王博洛爲定西大將軍。由大同統官兵往討之。命敬謹親王尼堪由左衛往圍大同。

孫可望遣使求封于明。可望既得雲南。明在籍御史臨安任僕。議尊可望爲國主。以干支紀年。鑄興朝通寶錢。而李定國劉文秀故可望同輩。一旦

自尊兩人不爲下。可望以事杖定國演武場。欲以威衆。孫李益有隙。可望聞永歷帝在肇慶。李錦等並加封爵。念得朝命。加王封庶。可相制。議遣使奉表。楊畏知亦素以尊主爲言。乃遣畏知及永昌故兵部郎中龔彝赴肇慶。進可望表。請王封明大學士。嚴起恆給事中。金堡等皆持不可。畏知曰。可望欲權出劉李上爾。今晉之上公。而卑劉李侯爵可也。乃議封可望晉國公。賜名朝宗。定國文秀皆列侯。遣大理寺卿趙昱爲使。加畏知兵部尙書。彝兵部侍郎。同行。時堵胤錫駐梧州。

先是胤錫駐肇慶。結歡馬吉翔。欲圖李元胤。永歷帝不悅。丁時魁金堡又論其喪師失地。

永歷帝乃令其總統兵馬。移駐梧州。

胤錫曾賜空敕。得便宜行事。昱就與謀。胤錫念李赤心等

不足恃。欲遙結可望爲強援。矯命改封平遼王。易敕書以往。

胤錫尋至潯州。自恨發病卒。

武康伯胡執恭者。慶國公陳邦傳中軍也。守泗城州。與雲南接。亦欲自結。可望言於邦傳。先矯命封可望秦王。曰。藉其力。可制李赤心也。邦傳乃鑄金章。曰。秦王之寶。填所給空敕。令執恭齎行。可望大喜。郊迎。亡何。畏知等至。可望駭不受。曰。我已封秦王矣。畏知曰。此僞也。執恭亦曰。彼亦僞也。其時永歷帝所封實景國公。敕印故在。可望怒。辭敕使。下畏知及執恭獄。

封貝子滿達海爲和碩親王。

五月改封恭順王孔有德爲定南王懷順王耿仲明爲靖南王智順王尙可喜爲平南王各授金冊玉印。令定南王孔有德率舊兵三千一百及新增兵一萬六千九百共二萬往剿廣西。挾家駐防其全省巡撫道府州縣各官並印信俱令攜往。靖南王耿仲明率舊兵二千五百及新增兵七千五百平南王尙可喜率舊兵二千三百及新增兵七千七百共二萬往剿廣東。挾家駐防其全省巡撫道府州縣各官並印信俱令攜往。

六月汾州平。定西大將軍端重親王博洛奏平衛二賊渠圍平陽遣梅勒章京譚布等擊敗之。賊渡黃河遁平陽汾州平。

開監生捐例。戶部奏歲用不足請開監生捐例及給內外僧道度牒准徒杖等罪折贖報可。

免江西四年五年逋賦有差。

攝政王多爾袞又率師征大同不至而還。

秋七月明永歷帝遣兵攻南安敗走。永歷帝遣兵度嶺攻南安別分兵兩路窺信豐。偪崇義清兵會擊奪其木城大破之。

命親王滿達海郡王瓦克達統師征朔州。

今爲縣屬山西雁門道

寧武。

復延綏鎮城 吳三桂李國翰復延綏鎮城斬賊衆四千六百餘級旋剿蒲城宜川安塞清澗等處捷聞下所司議敘

八月征西大將軍親王滿達海克復朔州馬邑 奏至下部議敘

定湖南 定遠大將軍鄭親王濟而哈朗等帥師克辰州進攻寶慶王進才馬進忠等戰敗遁去分兵定沅州靖州守將皆望風棄城走至永州周金湯熊兆佐等立柵大松橋拒戰敗之下其城復克黎平府郝永忠奔永從縣清兵躡其後永忠返戰擊破之永忠攜妻子潛遁

冊封朝鮮世子李湔爲朝鮮國王 朝鮮國王妃趙氏於六月中奏國王李倬薨請冊封世子湔襲爵至是遣禮部啟心郎渥赫等往祭故朝鮮國王李倬賜諡莊穆戶部啟心郎布丹侍衛撤爾岱充正副使封湔爲朝鮮國王

王 命定遠大將軍鄭親王濟爾哈朗班師

大同城中食盡姜瓖部下斬瓖以降 瓖部下楊振威遣其守備劉保來言

我等原係良民爲逆寇姜瓖迫脅而反今兵民饑餓死亡殆盡餘兵無幾我等二十三人合謀斬瓖歸誠至二十八日果斬瓖並其兄琳弟有光首

級來獻大同遂平

九月明監國魯王以海遁入舟山。明監國魯王以七月中至健跳所。江在臨

海縣東北

清兵圍之。會阮進救至得解去。時張肯堂

字載寧華亭人

方以私財募兵海

上明監國貽肯堂書云。將北還舟山。約肯堂共事。至是監國遂遣張名振

阮進合軍討斬黃斌卿。入居舟山。以肯堂爲大學士。吳鍾繹

字繼雅武進人

爲禮

部尙書

冬十月明樂陵王朱華琦被獲。漕運總督吳惟華奏獲故明樂陵王朱華

琦下所司知之。

十一月靖南王耿仲明自盡。靖南王屬下牛录章京魏國賢旗鼓劉養正

隱匿滿州。逃人奉嚴旨申飭。時仲明往征廣東。行至江西吉安府自盡。

十二月克南雄。平南王尙可喜等帥師征廣東。除夕潛兵襲南雄。永歷帝

守將江起龍倉皇棄城走。羅成耀方駐韶州。聞之亦棄輜重走高州。

〔庚寅〕七年

明永歷帝四年魯監國五年

春正月克韶州。明永歷帝奔梧州。是月六日清

兵下韶州。永歷帝聞庾關不守。大懼急登舟走梧州。加馬吉翔兵部尙書

與南陽伯李元胤督守肇慶。瞿式耜馳疏請留不聽。陳邦傳謁永歷帝于

梧州以其將茅守憲率兵入衛

李建泰據太平抗命勢迫出降伏誅 征西大將軍郡王瓦克達奏大兵平

定潞安平陽澤州僞總兵申亥郭亥魏閔各率餘黨歸順廢官李建泰據

太平我兵圍之二十餘日勢迫出降命誅建泰併其兄弟子姪黨羽俘其

妻室籍其家產入官

二月明永歷帝下其給事中金堡等獄 堡等既連逐大臣勢益橫戶部尙

書吳貞毓等欲排去之畏李元胤爲援不敢發會永歷帝走梧州元胤留

肇慶陳邦傳適遣兵入衛貞毓郭之奇萬翱程源乃合諸給事御史劾袁

彭年劉湘客丁時魁蒙正發及堡等五人把持朝政罔上營私罪永歷帝

以彭年有歸附功免議下堡等錦衣獄杖之大學士嚴起恆跪永歷帝舟

力請留守大學士瞿式耜七疏論救皆不納命法司定議堡以語觸時忌

與時魁並謫戍湘客正發贖配追賊

永歷帝再召朱天麟天麟疏言年來百爾搆爭盡壞實事昔宋高宗航海猶有退步今則何地

可退當奮然自將文武諸臣盡擢甲冑臣亦抽劔丁擇土豪募水手經略嶺北湖南爲六軍倡若徒貴票擬以爲主持政本今政本安在乎時清兵日偪永歷帝不能從但召天麟入直進官而已

圍廣州 時李赤心已死養子來亨代領其衆推高必正爲主清兵圍廣州

永歷帝命陳邦傳與必正東援邦傳故與李元胤有隙意在修怨又憾必

正等之屢擾其境也。陰令副將姚春等連結土司會來亨等調兵土司遂相讎殺。必正怒而歸邦傳駐清遠。馬吉翔駐三水。俱不敢進。廣州城守久。李元胤弟建捷拒戰甚力。永歷帝封爲安肅伯。

克全州。平南王孔有德率師征廣西。曹志建戰敗。清兵入龍虎關。即鎮峽關在廣西恭

城縣北六十里

馬進忠復敗于瓜里。走入武岡。桂林大震。清師長驅入全州。開國

公趙印選居桂林衛國公胡一青守榕江。與寧遠伯王永祚皆懼不敢出。清兵遂入嚴關。在桂林道興安縣西南十七里無一禦者。

三月擒朱由模及其黨朱由棟黃繼盛斬之。朱由模稱新建王于福建。被官兵生擒。福建總督陳錦奏命斬之。

夏四月改山海關總兵缺爲副將。

征西大將軍謙郡王瓦克達班師。

五月攝政王率諸王大臣出獵于山海關。

六月明永歷帝罷其大學士嚴起恆官尋召還。起恆潔廉遇事持平與馬

吉翔龐天壽共患難久無所忤。五虎憾起恆詆爲邪黨及五虎得罪起恆反力救吳貞毓等惡之。乃請召還王化澄而合攻起恆給事中雷德復劾

其二十餘罪比之嚴嵩永歷帝不悅奪德復官起恆力求罷永歷帝挽留之不得放舟竟去會郎國公高必正入朝貞毓欲藉其力以傾起恆言朝事壞于五虎主之者起恆也公入見請除君側奸數言決矣必正許之有爲起恆解者謂必正曰五虎攻嚴公嚴公反救五虎此長者奈何以爲奸必正見永歷帝乃力言起恆虛公可任請永歷帝手敕邀與俱還

孫可望復遣使求封于永歷帝可望欲眞得秦封不受景國公命遣使至

梧州問故永歷帝始知矯詔事瞿式耜上疏請斬胡執恭不納馬吉翔議

封可望激江王使者言非秦不敢復命大學士嚴起恆持不可兵部侍郎

楊鼎和

江安人

給事中劉堯珍

鎮雄人

等助之且請卻所獻白金玉帶時高必

正尙在梧州因召使者言本朝無異姓封王例我蕩覆北京蒙恩宥赦亦止公爵爾孫氏竊據一隅封上公足矣安敢冀王爵自今當與我同心報國洗去賊名毋欺朝廷孱弱我兩家士馬足相當也又致書可望詞嚴義正使者唯唯退議遂寢可望不得封益怒

秋七月裁陝西漢羌鎮留副將一兵一千名併屬興安鎮

裁蘇松提督學政歸併江寧提督御史

八月故明衛所屯田地畝照民田則例起科徵解 戶部奏故明衛所軍丁有領運之責故屯田徵派較民地稍輕今軍丁既裁凡無運糧各衛所屯田地畝俱應查照州縣民田則例一體起科徵解從之

九月孫可望率兵至貴州 可望由雲南東襲貴州匡國公皮熊走清浪衛追執之奪其兵又遣白文選攻破遵義忠國公王祥自刎死降其衆二十餘萬張先璧馬進忠皆歸于可望勢益強

孫可望遣兵據嘉定

舊爲府今四
川樂山縣

初永歷帝遣李乾德入蜀自巡撫進尙書

經略川湖雲貴軍務乾德察諸將惟袁韜最勇悍可用力說之攻佛圖關

在四川巴
縣西十里

取重慶亡何諸將大會韜以位高坐李占春上占春怒並怒乾德

欲襲取之乾德知有異走匿山谷間占春襲韜不克搜乾德船取其孥而返尋還之諸將益相猜韜及武大定久駐重慶食盡乾德說嘉定楊展與大定結爲兄弟資之食已而乾德利展富構韜殺之分其貲蜀人咸不直乾德可望聞展死將圖蜀乃爲展訟冤使王自奇將兵由川南進而別遣劉文秀渡金沙河出黎州趨嘉定韜大定方拒自奇于川南撤師還救自奇尾擊之韜大定大敗悉被擒嘉定陷乾德以其父死于流賊也曰吾不

可再辱驅家人與其弟御史升德俱赴水死文秀兵復東譚宏譚詣譚文盡降乃遣盧名臣下涪州占春敗走于大海在忠州知不支引兵出夔入楚與占春降于清師文秀遂據蜀

鄭成功攻潮州不克遁入海 鄭成功攻潮州總兵官王邦俊大破之成功遁入海

冬十月清兵勦邵武明寧南伯洪國玉總兵李安民閣部揭重熙被擒斬之十一月攝政王不豫 王以有疾不樂率諸王貝勒貝子公等及八旗固山額真官兵獵于邊外

克廣州 廣州城三面臨水李成棟在時復築兩翼附于城外爲礮臺水環其下清兵攻圍十閱月不下杜永和偏將范承恩約內應決礮臺之水清兵藉薪徑渡遂得礮臺是月二日克其城承恩來降永和由海道奔瓊州平南王孔有德攻拔桂林明留守大學士臨桂伯瞿式耜等死之 王永祚胡一青等俱以領餉入桂林榕江一帶皆空壁清兵益深入是月五日式耜檄趙印選出城爲戰守計不肯行再趣之則盡室逃一青及武陵侯楊國棟綏寧伯蒲繆寧武伯馬養麟亦逃去永祚迎降城中無一兵式耜端

坐府中家人亦散部將戚良勛請式耜上馬速走式耜堅不聽叱退之適

兵部侍郎總督諸路軍務張同敞同敞以式耜薦為總督有文武才每出兵輒躍馬為諸將先或敗奔同敞危坐不去或取勝軍中以是服

之自靈川至見式耜式耜曰我為留守當死此子無城守責盍去諸同敞

曰昔人恥獨為君子公顧不許同敞共死乎式耜喜取酒與飲一老兵侍

式耜令召中軍徐高付以敕印屬馳送永歷帝是夕兩人秉燭危坐達旦

黎明數騎至式耜曰吾兩人待死久矣遂與偕行至則踞坐于地諭之降

不從令為僧亦不從乃幽之民舍兩人雖異室聲息相聞日賦詩倡和得

百餘首閱四十餘日將就刑式耜從容肅衣冠南向拜訖與同敞並坐同

敞屍植立首墜躍而前者三人皆辟易

明永歷帝奔南寧 永歷帝至潯州亂卒夜掠街市火光燭天永歷帝亟解

維衝雨而去陳邦傳在清遠飛帆先歸邀却從官于藤江在廣西藤縣東北殺部郎

潘駿觀童英許王鳳等永歷踉蹌至南寧胡一青趙印選率兵駐賓州廣今

西賓陽縣

克平樂明征西將軍朱旻如死之 清兵由桂陽至平樂明永歷征西將軍

朱旻如臨桂人固守城破旻如殺其妻子自刎死焦璉方往禦鎮峽關俗名龍虎關

聞之遂走

克廣東省城 平南王尙可喜奏克廣東省城斬首六千餘級溺水死者無算肇慶宋裕昆等率所部降下兵部察敘

十二月戊子攝政睿親王多爾袞薨于喀喇城 薨年三十九歲訃聞帝震悼詔臣民易服舉喪丙申柩至帝率諸王貝勒文武百官易縞服出迎于東直門五里外哭奠盡哀

〔辛卯〕八年

明永歷帝五年
舊監國六年

春正月庚申帝始親政御太和殿諸王羣臣上表

行慶賀禮頒詔大赦天下

克肇慶高州梧州柳州諸府

總兵許爾顯克肇慶及羅定州

舊爲直隸州今廣東羅定縣

徐成功克高州線國安馬蛟麟克梧柳二州明永歷南陽伯李元胤安肅伯李建捷自肇慶走南寧尋請出靈山收高雷兵復略廣東郡縣

和碩英親王阿濟格有罪鞠實逮禁

先是攝政王薨夕諸王五次哭臨王

獨不至次日途遇攝政王馬羣嘶卒鞭令引避帝迎喪時王佩有小刀舉

動叵測會鞠俱實逮京幽禁

以蘇克薩哈

額駙蘇納長子

詹岱爲議政大臣